

本朝分省人物考

人物考卷之四十三目錄

浙江杭州府二

沈銳

洪鍾

張本

劉英

江瀾

吳雄

張銓

李旻

俞琳

朱惠

陳珂

陸偉

方銓

惠隆

胡世寧

吳瓚

徐潭

沈綸

劉溥

查約

吳鼎

邵銳

徐顯

徐咸

錢宏

江曉

陸溥王

許相卿

江暉

許仁

董穀

孫景時

吳玘

沈南金

張文宿

田汝成

劉紹卿

張淦

許應元

許貫之

張瀚

傅霖

茅瓚

吳源

高儀

沈楠

翁相

陳善

徐炳

陳洪濛

錢立

沈儀

邵旭

張輿

張輅

江圻

胡繼

董澐

黃裳

沈宣

馬洪

鍾化民

陳禹謨

本朝分省人物考卷之四十三

浙江杭州府二

沈銳

沈銳字文進仁和縣人成化己丑進士授刑部主事  
丙申陞員外尋陞江西按察司僉事初官西曹法比  
精練爲司寇陸公所器重及提刑江右聽讞明允事  
至迎刃而解會瑞州盜發銳坐分地謫雲南廣西府  
通判丁艱去服闋改判徽州庚戌陞廣東僉事瀧水  
後山賊起勢猖獗銳親率偏師直搗其巢俘獲甚衆  
平民脅執者皆爲昭雪羣下無敢冒功要賞所全活

者殆千餘人復改江西僉事銳方介寡合拙於進取爲五品者二十四年他人爲之不平乃稍遷副使乙丑陞廣西按察使明年進廣東左布政使尋陟應天府府尹南京刑部右侍郎未幾乞歸後值逆瑾盜柄多鈞擿往事以誣士夫之不附已者遂落職平生清介絕俗家居杜門泊如也嘉靖初追論舊德乃復其章服癸未卒

洪鍾

洪鍾字宣之洪氏世顯鄱陽自宋太師忠宣公皓賜第錢塘遂爲錢塘人年二十六以易經領成化戊子

鄉薦乙未舉進士授官刑部主事爲大司寇林聰所  
器重諸司擬議大獄取裁於鍾癸卯丁內艱丙午起  
復陞郎中丁未江西福建流賊甫定承命往審處之  
歸言福建之武平上杭清流永定江西之安遠龍南  
廣東之程鄉皆流移混雜習於鬪爭是以易閑而亂  
宜及其平時令有司多立社學以訓誨其子弟銷其  
兵器時以爲知本弘治乙酉陞江西按察司副使癸  
丑陞四川按察使所在發奸摘伏無所撓避自土官  
宣慰司皆懍懍奉約束安氏世有馬湖恃力驕僭爲  
地方患從容畫策去之請吏於朝遂以帖定丙辰入



覲陞江西右布政使丁巳轉福建左布政使戊午陞  
都察院右副都御史巡撫順天等府時朶顏虜勢日  
猖獗鍾以邊備積弛乃建議增築邊牆自山海關界  
嶺口西北至密雲古北口黃花鎮直抵居庸延亘千  
餘里繕復城堡二百七十悉城沿邊諸縣官無浪費  
而民不知勞又奏減防秋官兵六千人歲省輓輸犒  
賞之費以數萬創建浮橋於通州以利病涉毀永平  
陶窯以息軍民橫役之苦奪民產及牧圉草場之入  
於權貴者而悉還之遠近大悅名稱籍甚然權貴之  
扼勢失利者數短於上遂改雲南巡撫再改貴州

以之召還督理漕運兼巡撫鳳陽諸處正德丁卯陞  
右都御史仍董漕政戊辰命掌南京都察院事尋陞  
南京刑部尚書己巳正月改北京工部四月復改刑  
部閏九月以刑部尚書改兼都察院左都御史掌院  
事加太子少保賜玉帶庚午正月特命出總川陝湖  
廣河南四省軍務時沔陽洞庭有水寇丘仁楊清等  
攻掠城邑其鋒甚銳官軍屢失利鍾至以計擒滅之  
六年五月時川賊藍廷瑞與鄆本恕等聚衆往來寇  
暴川陝間遠近騷動勅鍾同巡撫林俊勦捕鍾涉歷  
險阻深入賊巢運謀設奇躬冒矢石前後斬獲招降

以十數萬擒其渠酋二十八人露布以聞六月加鍾  
太子太保賜玉帶土官楊友楊愛相仇激爲變衆至  
三萬餘流劫重慶保寧諸州縣隨調兵勦平之復其  
故業朝廷七降勅獎勵賜白金麒麟服進太子太保  
因被劾乞歸賜馳驛還鄉仍進榮祿大夫錄其孫一  
人人胄監旣歸築兩峯書院於西湖之上自號兩峯  
居士嘉靖改元詔進階特進光祿大夫柱國賜玄纁  
羊酒遣有司勞問尋卒於家謚襄惠

張本

張本字孟端錢塘縣人成化戊子領鄉薦錄文爲程

乙未舉進士授南京工部營繕司主事辛丑陞員外郎郎中出納惟公調度有方以清白著名丙午天官卿以襄陽重地簡出守適丁內艱不果赴弘治己酉改知青州府一以扶植教養爲心甫及三年治功有成壬子丁外艱乙卯復改之吉安吉安係江西名郡郡中故家大族以閥閱相甲乙貧難中下戶服役者動以百計循理守法者固多自重豪橫縱肆侵漁剝削之患亦不能無前爲守者置弗治姑息成風本察其實一繩之以法雖貴勢有所不避小民閔然稱善當道者交章薦拔而名益重時年踰六十連章乞歸

不報庚申陞廣東布政使司右叅政壬戌陞湖廣右  
布政使癸亥陞右副都御史巡撫江西時袁瑞間盜  
發特榜示之諭以生殺利害盜遂逃散地方以寧凡  
百設施一從寬厚而周窮濟急伸冤理枉惟恐不及  
蓋本守吉時威名素著故雖處之以寬而民之懾服  
自不敢犯乙丑武宗嗣位有白金文綺之賜推恩  
進階通議大夫正德丙寅致仕性剛介遇事敢爲無  
所顧忌而清操苦節始終一致戊辰卒年七十二

劉英

劉英字邦彥錢塘縣人自幼篤學操行高潔其爲詩

清奇俊逸修然出塵當天順成化間隱居不仕與劉士亨趙廷玉霍孟暘俞鳴玉結社賦詩英長篇短章備極工巧名振一時

江 瀾

江瀾字文淵仁和縣人父玘舉進士官給事中至山東叅政初母劉氏有娠夢髯翁白鹿抱授一兒旣寤而生甫能言卽知讀書在羣兒中雖嬉戲未嘗有嫚語長充縣學生督學者累試居首成化辛卯舉浙江鄉試戊戌登進士第選翰林院庶吉士未幾丁父憂壬寅服闋除編修丁未充廷試受卷官尋乞歸省賜

路費寶鑑戊申

孝廟登極召還修

憲廟實錄筆

削惟公凡寶訓皆所校正丁巳簡充東宮講官日惟靖恭輔導尋修大明會典凡制度品式攬撫精詳庚申九載考績陞侍讀學士壬戌會典成陞學士未幾修通鑑纂要一以春秋綱目爲準凡切於治道人才者論斷精確是秋武宗在東宮長髮以講讀官特賜白金文綺武宗嗣位以從龍恩擢詹事府少詹事仍兼學士會上兩宮徽號進中憲大夫與修孝廟實錄尋陞吏部右侍郎協恭匪懈獎恬退抑奔競人莫敢于以私丁卯賜御製龍文詩冬陞左侍郎守

法奉公與時鮮合值太宰張綵附逆瑾用事憾瀾不  
附已尋陞南京禮部尚書及履任凡慶禮祀典罔不  
祗肅每雨暘不時請禱輒應人以精誠所感四年以  
疾卒年僅六十有四未幾瑾敗贈太子少保謚文昭  
爲人溫厚純慤不逆人詐孝敬愛友見義必爲尤篤  
於故舊凡喪不能舉旅不能歸者卒爲資給平生未  
嘗言及私利大中公舊居悉讓諸弟別自構居一區  
徙居之常致書仲兄曰勿佃廢寺以貽後累立朝三  
十年小心翼翼始終如一每日必夙興趨朝雖風寒  
暑雨未嘗少間恒諭諸子少司空曉太史暉曰吾世



受國恩爾曹盍自樹立以圖報稱其令德雅量人稱爲長者且遜敏好學仕而益勤爲詩文渾厚典實不事雕琢所著有銓曹春亭東川稿藏於家

吳雄

吳雄字文英仁和縣人成化戊戌進士授刑部主事議者欲剖濬縣地隸河南濬人不服至執兵相殺雄往視則爲正其分界罪其尤健黠者數人事遂定歷員外郎郎中擢河南副使進湖廣按察使衛卒有以私憾殺其宗人而棄屍井中其妻子跡知之訴於官卒知夜令人啓寺棺出其屍易置之明日視之則非

也衆莫能辯雄他日避雨寺中見一棺血漬狼籍疑之召其妻子往驗遂得實衛卒抵罪拜應天府尹初視事集僚佐堂上告曰官職守藏卽無侵盜然事固當愁始視之果亡去若干錠雄密察左右卽得盜者狀一府驚以爲神明習法比斷獄精練其摘伏發奸老吏勿如也時應天歲早總漕者亟徵兌運米雄曰民已病不可重困奏請蠲免所部皆德之子祖乾仕至通政使

張銓

張銓字文衡仁和縣人吏部郎中信之孫太僕丞瑛

從子也成化辛丑進士官刑部主事爲人耿介不阿  
剛方直諒多挺挺大節時官大司寇者事多偏徇銓  
據法執爭不已尚書心切憾之竟亦莫能奪也冢宰  
屠公與銓有葭莩親銓絕不與通適屠有慶事僚友  
期與偕行銓義不往屠大憾之以爲輕已人有薦銓  
者屠不應惟直視賀軸以其無銓名也銓在刑曹十  
八年風節愈勵家貧甚夫人常糊紙錠以給衣食竟  
以廉介不求出爲廣西叅議舟覆水死

李旻

字旻子陽錢塘人成化庚子鄉試甲辰廷試俱第

一授翰林院修撰丁未預修憲廟實錄弘治改元  
充經筵講官明年以父憂去辛亥實錄成卽家賜銀  
十兩綵段二表裏癸丑服闋起滿九載陞左春坊左  
諭德庚子簡侍東宮講讀明年陞南京太常少卿兼  
翰林院侍讀尋以本官署南京國子監事正德丙寅  
召修孝廟實錄改太常少卿兼侍讀充講官賜金  
幣丁卯奉命授庶吉士業陞太常卿管國子監事未  
幾轉南京吏部右侍郎巳巳轉左尋卒賜祭葬旻長  
身修髯狀貌英偉學問貫串經史百家論辨疊疊聽  
者終日忘倦在史館善叙事理丘文莊公濬爲總裁

見所纂甚稱之其爲人闊達倜儻不甚拘守繩尺亦多爲人所忌云

### 俞琳

俞琳字德彰臨安縣人成化丁未進士授行人拜監察御史居無何進鴻臚寺少卿儀度安整音吐宏暢擢右通政再轉通政使仍掌寺事每讀疏大庭朝寧傾聽其任鴻臚及銀臺者皆十許年累官太子少保工部尚書仍掌通政司事琳天性醇朴無巧僞習慷慨尚義嘗以忠孝自許爲工侍日值塞北有警上曰保定等五府武備當嚴非其人不可乃命琳兼右

僉都御史往視師琳毅然星駕指授方略旣戡定邊  
患戢兵歸朝口不言功士論多之初琳爲行人嘗使  
周府舟次歸德感疾甚篤仰天歎曰丈夫志在四方  
卽不幸客死命耳奈老母何因痛哭失聲是夕忽夢  
五老人鬚眉皓然語琳曰爾母壽高爾壽亦遠病當  
尋愈母多傷琳叩姓名答曰此地五老人耳旦訪之  
則宋太子少師杜衍侍郎王渙司農卿鄆世長郎中  
朱貫馮平年皆八十廟食茲土云

朱 惠

朱惠字懿卿仁和縣人初爲諸生時家甚貧而其父

頗難事惠自甘淡泊乃力營甘旨以進艱辛萬狀不敢告勞登成化丁未進士擢南京湖廣道御史時內豎蔣琮守備南京以威權排逐縉紳事多不法惠抗疏劾之權奸股栗弘治丙辰擢湖廣僉事值奸宄縱橫殺害良善惠首置於法以令境內藩府二役並興民不堪命卽爲檄請罷止於是湖南一境始獲息肩居二歲竟卒於官

陳珂

陳珂字希白錢塘人弘治庚戌登進士念母年高乞恩歸省五月母歿居廬三年癸丑除授刑部主事無

何奉勅錄囚南畿謂刑故無小過宥無大刑官雖當  
多所平反而亦不可姑息爲徇御史樊祉知府程讓  
故出重囚劾之皆得譴還朝陞本部員外郎榮王啓  
封國於湖南大學士李文正總核時弊推陞工部營  
繕司郎中董其役辛酉轉刑部郎中河間密邇京師  
繁劇難治大司馬白康敏公舉出守珂至去苛削之  
人斥乾沒之吏先是山水衝決民蕩析離居思所以  
還定之攢木畚土甃石爲堤六十餘里水安故民復  
業四萬餘口時又值亢旱徒跣禱於山川雨如注冬  
無雪傷麥復禱輒應麥有秋獻縣民李時訴盜殺其



叔李文子林劉信妻亦訴盜殺其夫珂牒於城隍是  
夜夢雌狐臥於繡幃中起奉首指猩猩欲言珂寤翼  
日召林妻鞠之得其情捕盜劉永王翰及李政劉氏  
俱坐謀論死吳鑑坐強盜死闔郡稱爲神明巡按御  
史李璽奏聞於朝銓部亦以課常最擢福建左叅政  
遷按察使時內使陶錦怙勢張皇珂正色危言無所  
諱陶亦自戢不敢恣睢逆瑾用事遣御史捕鹽徒盜  
賊民賴以安陞右布政使武平大帽山鯨賊猾驚乃  
便宜發帑中錢具糗糧芻茭給官軍賊就駢戮六年  
轉左布政使設貸賑之法定徭役之條寬舶商椒票

之征建通濟橋七年餘洞民咸利之愛若父母八年  
陞都察院右副都御史巡撫河南去後常見思乃爲  
建生祠尸祝之其巡撫河南適流賊之餘邑里無儲  
糧賊黨孫郁等尚爲民梗首命兵勦平之仍命有司  
收瘞餘骸勒石表男女死節者又申冤獄知縣袁鉉  
指揮葉章等五十餘員俱付奏請得麗末減新野縣  
當荆襄之衝內官私置抽分廠漁獵民乃檄守巡官  
毀之正德九年春二月沔池縣河清二百餘里具疏  
以聞因言宜迪德祗承休命十年入爲大理寺鄉保  
定民吳澤詐稱觀音現夢佑澤後當大貴其弟海復

傳播以誑愚民倖臣朱寧訶得之差官校擒澤等二百餘人以謀反聞刑部送澤等至大理寺覆審珂駁議止坐澤造妖言海傳用律斬餘從寬貸具列上聞竟俞議十一年以年艾足疾求致仕疏凡七上乃得請仍賜馳驛回北歸謝絕世事是嘗以詩文自娛嘉靖改元詔進階二品珂敷歷中外三紀章疏無慮十餘大約皆經世大猷其論河南平原易野戰以車爲主宜倣古魚麗偏箱之法番長於馬漢長於弩宜各任其所長時未及用識者韙之卒年七十有六所著有五經發揮孫子斷註行於世

陸偉

陸偉字仲奇號質菴錢塘人成化乙酉鄉薦值家中  
替開門授徒資以爲養一親相繼下世哀毀幾滅性  
旣而累試禮部輒報罷久之謁選天曹試居第一授  
山西澤州知州州罹洊饑人至相食奏發內帑沿門  
賑救區畫纖悉不懈晝夜全活以數萬計於是人人  
貌像而生祀之州多宗室分封和買吞併之害其來  
已久歲時祿米後輸辱及官吏率以爲常至則悉裁  
之以法世家大族鄉曲困武斷閭左苦陵轢者皆禁  
不得肆與夫請託一切不行因相與銜之嫁禍於偉

嗾宗室誣奏數事下三法司勘讞詔使初至惑於浮言幾中危法州民無老少填塞街巷爲之稱冤使者繼至始廉得其實事乃白比去猶相慰藉母以此沮時鄰封大同有獄久不決檄訊之盡得其狀發摘如神澤州有寧山衛軍民雜處恒患弗靖懾之以威彼此帖然總鎮中貴歲有祗候之索所屬爭先取容偉獨不與旣而政通人和乃葺州治新儒學葺明道程先生舊祠至於漏澤園常平諸倉達路津橋靡不畢舉然小民雖甚戴德而前怨家興訛造謗爲害未已莫曰人當自知止足不然必速顛躋乃力懇當路致

其事而歸州民攀留數十里不絕車枳不得行多有  
泣下者慰諭而遣之歸惟以教誨子孫爲務每夜至  
二鼓方就寢家庭肅然宗族不能婚娶里鄰不能殯  
葬者已雖不給亦汲汲以周之間與鄉之不仕及倦  
而歸者徜徉於西湖孤山之間更唱迭和有歸田錄  
傳於時居常甘淡薄於世味漠如也每謂士當以立  
志爲先以涵養爲要否則大本不立一事不可爲矣  
年至耄耋燈下能讀細字喜吟詩有稿藏於家作字  
不喜行草與卑幼家問亦真楷如啓劄益其天性嚴  
整然也嘉靖壬午疾終於正寢遺言子孫仕者以忠

孝報國處者以勤儉守家享年八十有九

方 銓

方銓字景衡新城縣人成化中由舉人任湖廣安陸州學正奉父之官更爲創寢室於學署旦暮具衣冠至寢所問省興居或燕飲歸雖丙夜不釋衣冠必往侍左右俟其寢而後退易學通明躬授諸生課業講習不怠業他經者則延訪隣郡經術通洽之士爲之師一時成才特盛如孫交劉洪其最著者也及丁外艱歸諸生泣送不忍別服闋改汝州卒

惠 隆

惠隆字從道號北屏仁和人弘治壬子舉順天鄉試  
癸丑遂登進士第乙卯授刑部主事分治禁衛勵精  
法律剖斷如流獄無冤滯進員外郎郎中不蔽要囚  
益欽且慎時山陝宗室與縣令構訟累歲不決隆奉  
勅往勘立爲剖斷時謂平允大司寇毘陵白公烏程  
閔公咸雅重之凡獄經訊讞不復詰勘方留俟內陟  
時逆瑾勢方熾隆剛直不阿欲外補以避之正德丁  
卯擢守永平平盧古雄鎮民俗勁悍隆以嚴治發奸  
摘伏植弱鋤強政令一新時中監擅權使遼左者絡  
繹於境至郡則斂戢以去莫敢需擾民賴以安且修



孤竹廟建昌黎祠以崇祀典卓有循良之稱已已移  
守寧國至則咨民瘼祛吏弊別淑慝覈徵賦清訟獄  
庶政畢舉宣城值水災民多艱食則發廩給粥以賑  
之所活幾數萬民用懷之有劇盜繹騷民心震恐則  
簡銳卒厚賞犒不旬日而就擒民有寧宇且梓謝玄  
暉詩樹文天祥石記表章諸先賢義烈祠宇以勵風  
化於是有去思之頌庚午擢江西按察司副使江西  
民俗競訟隆素諳法律一訊而決故署學政釐水利  
憲度貞肅時宸濠逆謀未露而脇權附勢寔繁有徒  
不難不竦悉繩以法罔貸桃源巨盜猖獗巡撫中丞

王公知其才略以兵委焉隆運籌制勝擒厥酋而顯  
戮之民用敕寧歷官中外幾二十年所至以治績顯  
時有公輔望辛未甫踰強仕卽以止足爲戒遂解組  
歸家居事繼母以孝敬處昆季以友恭廸子姓以義  
方督僮僕以藝殖營別墅於所居東澣茅亭花榭極  
幽雅之趣凡親友過從款洽無厭以私干則峻拒之  
故自謝政以至垂老足不履公門口不談世務暇則  
與樂聞吳公輩爲五老歸田會登眺湖山以觴詠自  
娛倣唐香山宋洛社之遺矩繪圖梓詩以傳至年七  
十有三卒

胡世寧

胡世寧字永清仁和縣人誕有異表弱齡負巨人之度讀書不治章句惟慕古奇節偉行數夢與于肅愍議國事於朝家貧出贅昌化李氏因補昌化縣學生受知吳提學伯通有草中靈芝鳥中孤鳳之褒弘治五年壬子以書經舉鄉試第二例有司給道理費人百金世寧以浙右歲饑獨受五十金而行癸丑舉進士歸例得坊其門時須關謁鎮守中貴人世寧重折節棄之去八年授湖廣德安府推官時岐王開國庶務方殷且羣從素驕世寧惟謹禮明法感以至誠曰

朝廷法卽殿下家法某何敢縱 朝廷民卽殿下  
千百年立國根本某何敢不恤衆由是憚其正而服  
其公及請民間開墾湖田充柴炭撫巡業與之指畫  
利害娓娓乃止於獄之小大必以情幽滯輒從平反  
其清里甲均差役練民兵廣儲蓄諸條畫具可爲法  
十三年陞南京刑部陝西司主事西寧侯家訟久更  
九司十三道訟者老且貧矣比至一鞫卽得其情云  
法如是如是特聽訟者善避嫌不如我愚而直任也  
訟者感泣而決顧金箔者富翁也被誣羅織致大辟  
務求直情辯雪之顧後每過門必稽顙而去其不爲

威富所奪類此十四年應詔陳邊務十事而士風國  
川武備將權尤切時病暇則延集同志講求濟世略  
十八年叙進員外郎適武宗登極實授奉訓大夫  
復應詔陳六事勤學問慎輔導廣延納重守令公用  
人汰冗費探本遠要識者許其大臣才具矣機戶顧  
謙侵官錙累萬力正其罪謙祈解不能干正德三年  
積三考出知廣西太平府郡陋甚屬吏桀黠難制至  
則推心撫之絕其饋獻踰月夷酋若思明黃文昌羅  
陽黃景明茗盈李萬榮全茗詳榮高等欣服惟所操  
縱惟太平知州李璿阻兵負固跳踉不已乃密檄龍

英州趙元瑤捕之元瑤興疾力攻渠魁面縛散其積  
以紓乏困籍記治夷十事爲代者告黃文昌兄弟稔  
亂大將徂征世寧協贊方略不費一矢掩捕成獄他  
如平羅陽之爭立定茗盈之疆土積惡頓息郡治三  
面逼江惟北無限因建壺關堅厚閼峻費不及民至  
今賴之僅半載聞內艱去世稱治邊郡之良者必歸  
焉六年服闋補寶慶初朝岷王聞岷府受詞繫人取  
其財下諭皇老奉有令旨必併其人送府驗實僞者  
弗貸後王索民校急出領計校尉僉沙衡永保四府  
今歸寶慶一府他日分封繁衍其可支乎王曰御史

奏得旨矣曰御史錯知府當奏改正王器其直無愠  
意值巨璫偕鎮守至郡縣集夫千且哀金餽之罷之  
接以常禮鎮守王潤肆橫索折以法潤斂手他日其  
人以左道寓郡執之恣射平民者又執之潤啣深而  
猶稱爲好官云郡屬糧繁漫奸不可詰乃類田均糧  
而畫一徵之民省歲供之半闔境大呼曰太守免我  
糧矣七年陞江西副使兵備東鄉新縣舊賊巢也抄  
掠爲饒信患諭禁招捕威信明確擒馘怙亂樂庚二  
陳邦四輩奏免效順王賽一之死旣而遷縣築城經  
武賑饑民安然安矣時爲語曰姚源之事三都堂處

之而不足東鄉之事一兵備任之而有餘嘗調征姚  
源大盜王浩八提兵深入戰於裴源山下一旬三捷  
會宸濠志不軌誘受天下亡命構害鄭布政岳觀世  
寧與鄭周旋且忿其論對峻直迫世寧出討賊世寧  
亦自是不至南昌他日憲司檄回賀濠生辰曰是欲  
致我而制之也不往諸守巡亦不往已卯之變竟以  
是網衆蓋先見其幾云凡寧府人至撫營私殃民者  
輒裁以法忿發抗疏曰江西之禍不止盜賊可慮者  
省城失火延燒萬室基地所便盡歸王府債負所責  
遍及閭閻庄田所逼民久立寨三司官員多受鈐束



問刑叅吏舉奉成案買辦漸行於外府騷擾遍及於窮鄉良民不得安生羣起爲盜臣下恐有隱禍多懷二心禮樂政令漸不出自朝廷地方之事益有可慮又言寧王自討衛兵以來威勢日盛上下官司奉承太過乞推大臣兼任提督巡撫假權便宜悉聽計畫區處更乞戒諭寧王自治其國三司以下政務不須干與嚴戢下人恪守禁例凡王府發放事例必須奏准方許奉行庶幾地方無意外之患 九重紓南顧之憂累千餘言事下兵部取旨移文寧府令自鈐束其下而已濠至涕泣自咎亦懼且悔矣自世寧厨解

門達皆置人然覘其廉正不可汚乃摘前疏禮樂政  
令不出朝廷諸語誣爲離間妖言誹謗奏逮之未下  
已陞福建按察使離任矣臨發中食毒幾殆蓋濠爲  
之又嗾其黨巡按御史潘鵬遣官挾濠卒誘執之世  
寧間行會逮繫詔獄刑訊踰年濠必欲殺之賄用事  
者抗章言應死者三瀕死屢矣言官交章論救用事  
者迫於公議得減死謫戍遼東瀋陽中衛十一年抵  
遼撫按禮遇之不就館穀躬履行間講學授徒自業  
凡四載十四年六月濠反十五年始直世寧起戍中  
爲湖廣按察使十六年遷右僉都御史巡撫四川辛

已行且疏辭適 世廟更化首批胡某以忠直擢用  
不准辭遂手疏勸 上修德講學取大學衍義省覽  
以光聖德薦魏校何塘邵銳堪講官林俊劉忠林廷  
玉堪輔弼及言擒江彬擒宸濠均當論功附宸濠附  
江彬均當論罪武臣如指揮牟斌執法受罪內臣如  
周儀守正殺身宜一體褒錄無不讜切當 上心者  
蒞蜀甫兩月時松番背叛議處軍餉令近邊者輸租  
於邊而縮其額以所縮加內地而勿輸邊勞逸輕重  
均焉乃疏安撫方略要在用人才增兵將更賞罰足  
財用事下兵部議行芒部隴氏請分設長官司議不

可許世寧上疏隴氏裂地設官雖稱衛彼實爲筠連等縣扼其襟喉從之便樞曹不用令隴壽襲職竟爲隴政所殺人服其識又劾退貪虐帥臣張傑太監趙欽蜀境大悅嘉靖元年晉吏部右侍郎未任奔父喪三年詔議 睿皇尊號廷臣強諍多被朴除名屬江淮薦饑時免喪家居上奏曰方今急務孝親爲大保民爲本乞早定追崇大禮肆赦羣臣小過使之各陳救荒弭亂保民之策而議行之以綿 皇祖考萬世之祀則陛下萬世之孝也夫諫者心協忠誠質異強弱或斃雷霆之下終傷日月之明大爲天地生成之

累夫新進議禮一言適合未必其事事之皆是老成  
執禮一言過當未必其事事之皆非臣願陛下惟是  
之從無以新舊先存適莫於中繼復舉前古治亂關  
於戚宦宰執者以規警明盡懇直累千言既有議遷  
顯陵於燕山者世寧乞嚴絕儉壬極論遷葬利害  
君臣協恭惟任賢保民爲務并前疏並進 上畢覽  
深嘉之自是浸尋大用矣四年起兵部左侍郎進備  
邊二十五策復進言保養 聖躬願慎重藥物獻三  
經講義大學秦誓好惡之章以戒媚嫉尚書惟辟作  
福之章以重威柄易大傳不出戶庭之章以慎事幾

諄諄多中時忌悉留中於是言者劾世寧啓告密導  
妄殺之漸亟引罪乞骸不允五年命知武舉言者論  
列未已力求退改南京吏部左侍郎六年考察留都  
五品以下文臣去留咸所鑒正五月拜南京工部尚  
書舊凡轉輸至者弗獲時納有候至數年者乃使謂  
內監曰如更阻難當別處耳蓋欲奏徑輸京師也不  
數日納竟者五十餘輩又福建解至料銀幾二萬皆  
赦前已徵者所司以時價不酬欲令加徵乃疏各省  
未輸者盡行蠲免而解至者反加徵情理豈堪得請  
直輸其銀於京免重困焉七月以左都御史召過沛

疏治河事宜及瀕河夫役之苦道改刑部尚書尋用  
詹事霍韜言加太子少保左都御史掌院事振舉憲  
度釐正敝習首疏勸 上當涵養上心使寂然在中  
無所偏倚遇事當喜怒者則又臨時省察其中節與  
否而後發之至論聽言用人言殊剴切 上嘉之務  
持大體以近年刑獄未清乃裁上畫一之法申明職  
掌凡十條最後論執法被誣奪職者復其官制辭褒  
美俾中外遵行而考察奪職者始許大臣言官論辯  
矣執政請禁私謁世寧言臣官以察爲名人非接其  
貌聽其言無由知其心識其才若屏絕過從徒采浮

言按考語而求激揚之當難矣 上是之世寧之再  
召執政有力焉終不與黨其在刑部時於重辟擬罪  
研究情法必允雖奏當論定者不避嫌謗執議懇惻  
弗憚 上嘗感悟納用太監剛聰與運舟爭道誣漕  
運官兵奪其織造費幾陷二千人乃疏不宜廣追牽  
連 上是其言竟從寬政至秋聰家僮訐聰自私誣  
衆之罪 上下聽獄抵法而言益信時遣官分錄天  
下罪囚事竣悉審別當否品其勤惰而効其縱者其  
因事建明得著爲令者三陳九疇者故以兵備巡撫  
有事甘肅兩敗土魯番兵於時彭澤總制楊廷和秉



政士魯番因再失利縱反間傾九疇楊彭欲坐之嗾  
儉人煽言哈密淪陷番達寇暴釁起九疇於是下九  
疇獄擬大辟昌言於朝曰世寧司刑而殺忠臣寧先  
殺世寧執政持不可乃奏述四事詳辯九疇之冤明  
其決不然上大悟曰豈我殺巡撫都御史償回子  
命耶九疇由是貸死戍邊七年春世寧疾作乞骸命  
子純入監讀書是時奏河清甘露降方告謝齋宿忽  
風霾興當世寧求黜應變不聽隨上勤學恤民任官  
十事轉兵部尚書加太子太保世寧辭言甘肅之危  
可慮中原兵將錢穀無備可慮臣弱才恐負重任再

辭不許復陳兵政十事以取進止 上許世寧就職  
次第議之世寧乃拜命大臣建議銷兵世寧証古籌  
今辨其非是議遂格已而土魯番合瓦刺入寇我師  
敗之夷復請釋舊羈番使下兵部計宜者世寧言番  
夷變詐反覆邊臣奏報牴牾再舉陳九疇禦虜始末  
備述先朝馭夷故實以及今日圖復哈密利害審究  
情勢樹久安之宜柄要喜功者中沮之八年春世寧  
申論增武備足邊儲用人才三事薦馬昊陳九疇施  
儒揚必進才堪統軍禦敵選曹以世寧侵官格不用  
世寧亟辭疾不許特暫免其朝叅世寧又極言任人

圖治今日當務以自盡始終之義然時益多忤世寧  
難久容所請彌懇上慰諭不從疏三上乃許致仕  
驛歸廩役備給如典庚寅三月復以南京兵部尚書  
叅贊機務召世寧再辭疾篤猶力贊上圖廣嗣續  
容受直言愛惜人才云九年秋九月丙辰卒於家壽  
六十三贈少保謚端敏詔省臣諭祭勅有司治葬事  
幼嘗學武精騎射正德庚午服闋赴京至滄州遇大  
夥賊刼掠焚殺勢甚猖獗前途孔棘乃避入城中州  
守張琦漫不爲意世寧激以忠義授以方略協力捍  
禦憑城對敵奮不顧身賊不敢近數日城賴以全

吳璚

吳璚字器之仁和縣人弘治庚戌進士初授弋陽縣令調永新陞南通州知州甫兩月乞休璚勇於去就以子寃未洩力辭軒冕性好吟咏多撰述考求遺聞作武林紀事八卷卒年九十餘

徐潭

徐潭字汝容錢塘縣人廣南守敏之子弘治癸丑進士歷官南京刑部郎中秉公守法請託不行改工部郎中時工役繁興潭爲程其出納會計詳慎乾沒者無所容奸庚午陞湖廣叅議無何晉按察司副使兵

備辰沅豪貴陶倫罪當死以千金賂潭潭却之持益  
急後其人賂代事者竟得縱而潭反被深文之名遂  
罷歸囊橐蕭然居無華堂出無輿從性耿介然好義  
樂施赴親交之急輒傾貲與之雖至空匱勿渝也

### 沈綸

沈綸字朝綬仁和縣人和子弘治丙辰進士累官南  
京禮部郎中廉州府知府清介絕俗恪慎官守旣典  
郡不以家自隨矢志貞潔廉州古合浦也中貴守池  
者往往乾沒於是豪右相緣爲奸綸一切裁之以法  
民獲安生權豪側目卒中傷之綸死二十餘年民思

其德爲築愛民亭以旌廉平繪與父和俱爲二千石  
兩世專城家猶四壁人服其廉

劉溥

劉溥字潤民新城人幼聰穎讀書數過輒成誦歲饑  
父致粟數百里外忽心動亟往迎之中途父果疾遂  
扶以歸年十七入縣學弘治丙辰登進士第授永寧  
知縣教民耕作租調日裕舊有礦盜設禁防之盜用  
衰息永寧地僻士少知學立條約率之趨業邑有程  
子書院久廢溥曰此大儒講道之所庸可泯耶遂更  
新之於是士習漸勵有名列賢書者矣越二年遭母

喪去任民遮道泣送之服闋復除藁城縣政化大行  
豪猾屏迹有夜殺人者誣爲仇家擊石斃之久而未  
白廉得其狀令其人試擊之弗中溥曰汝畫擊弗中  
彼夜擊反中耶犯者驚服邑人德之至畫像以祀嘗  
勘寧晉皇莊直其地與民主者賄之不聽卒致誣奏  
被譴而氣弗少挫修紫荆關隘成當道薦之尋以考  
最賜勅褒嘉正德丙寅召入拜山西道監察御史出  
按南畿屬吏有犯率親鞫之黜貪婪數十人至有望  
風遁去者地方災奉命便宜行事溥薄輸納均貿糴  
借周於富室饑者給饘粥病者予醫藥子女道棄者

令有力收字之全活無慮萬人死則爲義塚瘞之後  
人爲立石以識遺愛災傷之地或躬自存視有父老  
數輩迎拜道左曰憲臣蒞鄉村閱災前未之聞也因  
相與致祝而去行臺一樓相傳有祟不敢居溥曰邪  
豈能干正乎乃寢息其上竟無他庚午奏訐逆瑾黨  
與不法事稱旨明年供事南郊連蒙金幣之賜未幾  
陞順德知府適巨盜流劫屬邑設法嚴爲之備獲首  
功總制陸公薦其才賞以金幣河決黃陵岡撫臣檄  
取役夫八千溥曰兵荒之餘戶消民困何以堪之欲  
減其半撫臣怒極言劾之遂罷築亭塋側扁曰興思



歲時瞻掃以志風木之感忌日雖疾猶強起過悲疾劇不起距生春秋六十有二

### 查約

查約字原博海寧縣人弘治壬戌進士授南京刑部主事進郎中陞福建僉事恭勤畏慎所至輒問民疾苦旌義烈辯冤獄馴妬悍治有異等屬歲旱疫癘大行約躬勤禳禱給藥療之清汎狴犴開釋無辜天大雨戕亦良已延平邵武暨福州軍相繼煽亂約以單車申諭衆咸戢服擢山東副使以憂去補江西持廉秉公嘗以訊決脫士人於死人誦其明進福建叅政

約舊有施於閩人咸悅其來至則治學舍廩孤貧惠  
養士民士民懷之陟左布政使值歲洊饑乃下令諸  
司掾上納者悉出穀分貯於各倉以備賑濟建議跡  
馬端肅劉忠宣於祀典以訓官常合羅文節章文懿  
祀之專祠以勵士節皆有補風教會有旨命尹應天  
繼命撫山東報皆未至值候官反獄羣吏皆散走約  
以前三郡兵亂皆單身諭降威德素著於閩冀賊可  
化誨乃銳身以先吏卒未及發語賊狎突而前約大  
呼擊賊左右莫有應者遂遇害閩人聞約死皆慟哭  
立祠祀之

吳 鼎

吳鼎字維新錢塘人中正德進士尹臨淮臨淮帝鄉民習游惰鼎一蒞任弊政悉去風俗改觀其穎識敏裁便宜張弛更以辦治稱監司使者僉上治行異等堪風紀選不報 毅皇帝南征侍衛中外諸騎乘數十百萬所過縣次續食有柄事中貴人道臨淮非分徵索供具無厭橫甚鼎從民吏往致常饋不贏中貴人大觖望憤詬呼挺鼎銳身先民吏當之民吏爭前擊傷中貴人中貴人奏逮鼎繫獄一歲所廷議白還原職用久之徵爲南京刑部主事轉南京兵部主事

以承德公喪罷歸除服謁告不任者十有五年補南  
京兵部員外郎轉南京禮部郎中遷廣西布政司左  
叅議乞侍養亡何病卒年五十三生平醉心文詞令  
臨淮時聽政之暇卽手持一編不能頃刻置遇名士  
大夫博文邃古者輒委已交驩與相上下其謝病歸  
益專力萃精償其積志六籍而下九流諸子等書罔  
不雋飲醇酣挾藩入奧故其文深涵博大能達所欲  
言蒼然有西京風骨所著名泉亭稿行於世郕之子  
遵晦山東按察司副使

邵銳

邵銳字思仰仁和縣人也正德戊辰舉禮部第一登二甲進士改庶吉士時值逆瑾擅政焦劉深相結納其子皆選吉士未幾傳旨俱拔編修銳以甲第在二子上亦併授焉銳恥與爲列方具疏辭免會伯兄以危言沮之曰會元得史職亦常分耳公議自在於汝何尤尋以父喪守制瑾敗詔革傳奉官銳亦在革中言者以非其罪服闋改寧國推官尋陞南京文選主事遷祠部員外郎以疾告歸起爲江西提學僉事陞福建提學副使抑浮崇實士習丕變兩省至今稱焉歷湖廣叅政河南按察使廣東山東左右布政使

曾有惠政進爲太僕卿復引疾告歸不久卒持身端確喜怒不形省身克己務求合道然恥於近名不立門戶人稱真道學云卒之日囊無餘金田僅百畝且以陰讓兄之子人尤難之贈副都御史謚康僖殊典也所著有端峯存稿

徐顥

徐顥字子淳號龍山錢塘人正德十一年舉鄉試高等十五年會試中式明年辛巳賜進士授南京刑部主事職理京畿訟獄號繁劇難治旣明察強力有執守日孜孜究心法家言踰年大閑習所書獄辭老吏

不如也同舍郎有疑獄多就問咸爲代剖情法允協  
諸郎咸自以爲弗及由是練達刑名之譽奕奕播留  
都間而顧恥以刀筆自居折節講學慨然慕程明道  
朱晦菴之爲人素倜儻不羈高論時出人意表至是  
一變頓爲沉默簡重意氣雍如也嘉靖五年進本司  
員外郎尋轉貴州司郎中就署內建澄心亭暇輒靜  
修於中七年父艱去職起復除刑部陝西司當是時  
蘭溪唐公爲少宰延訪天下奇士士多推轂徐君者  
唐公就見驟問責難於君何以謂之難對曰君所謂  
可而有否者焉臣獻其否以成其可君所謂否而有

可者焉臣獻其可以去其否茲何容易矣而老生常  
談堯舜之道爲難奚其難唐公悅以堪任大用薦爲  
儀制司郎中益殊調也 皇上方嚮意稽古禮文之  
事札下春官無虛日咸爲草創其儀無遺謬者賜敬  
一箴大禮集議大學衍義諸書屬天下歲貢生候部  
至二百人力爲建白聽其附試京府以廣旁求路益  
禮部歲貢生預鄉試始此顓亢厲守高公卿以下干  
請一切不行要在絕私交行已志專心上報而已以  
嚴見憚不得久居內遷拜臨江太守躬勤庶政常夙  
興以矯游惰撻奸發伏如神吏民莫敢欺他如去門



卒通塞蔽刻題名表官箴作郡志記文獻祠旗纛修武備皆井井規畫利當時而法後人赫然良二千石矣而達官貴人取道臨江泊舟去府治且三十里顚雅意不游聲譽非大事弗出郭要人請託輒拒之曰寧負權臣不負吾民又郡中貴強之家干禁痛繩以法不少貸治郡幾五載不遷考績行過家居兩月一疾遽卒時年四十二已耳少時善飲酒父誠之絕口不飲及鹿鳴舉鵬猶以未奉父命爲辭父嘗患怔忡疾不解衣半歲父沒而養母太安人躬備甘毳家事必稟進止廩祿貨財悉委於三弟傾囊助之其內行

修謹如此

徐咸

徐咸字子正號東濱仁和人以尚書領浙薦正德辛未登進士俊才穎發與人交不詭於俗居官不事皦察務持大體人樂其寬初守沔陽沔屬兵燹後且值陵谷懷襄民嗷嗷待殍咸務在撫輯惠養區畫中理民多全活初沔地宜黍鮮植嘉穀咸爲之陳厥疆畝引渠灌泉略倣吳地播種之法與民習之民享其利居三載入覲屬吏託餽名盛貨帛以進率謝却之廉譽益彰隨陟夏官郎去民思之肖像爲生祠夏卿

喬白巖公雅知咸會 武宗南巡咸凡事豫戒備無  
不周白巖公曰能助予者咸也公嘗謂其賢擢守襄  
陽爲政一以平易近民爲本民以是益親附之歲值  
恒陽躬率父老恪修雩祀憊暑不輟而甘澍應妖民  
惑衆禍叵測咸計磔渠魁脇從不問悉解散其牧襄  
一如牧沔故襄人戴之猶沔人也廖太史鳴吾作楚  
紀列咸於登績傳童太史內方以餘姚孫衍華亭張  
弘與咸先後同官均有懿政目爲三高嘉靖丙戌入  
覲忌者阻之罷歸日事編纂有國朝名臣錄澤山野  
錄詩有東濱三稿平生天性孝友宅心坦夷侍奉直

公昂及太宜人王寢處飲食省視必躬官至二千石  
田宅不侈常祿之羨悉畀仲兄節奉怡二親不制其  
出入無毫髮留爲筐篋計又爲仲兄築室以居後家  
事日落寒暑製衣及衾溫涼適體有疾奉美飲食至  
老不衰以故稱孝友者無間言嘗築園城闔曰餘春  
每遇勝日邀伯兄豐厓及郡中名士携鹵榼碁秤於  
禪扉竹徑觴咏陶然仙如也嘉靖丙寅夏六月卒年  
八十有八

錢宏

錢宏字可容錢塘縣人正德戊辰進士授刑部主事

進員外諫獄西曹以明慎稱陟山東僉事巨寇王堂  
趙志劫掠近縣宏督兵一鼓擒滅之擢副使革鎮守  
無名夫役刑其厲民者民賴以安宏在山東久多政  
績至拯章丘水災所全活萬人功德尤著擢廣西按  
察使陞福建右布政使轉湖廣左布政使進副都御  
史督兵南贛簡閱兵備節財裕民建趙清獻文信國  
二祠以訓忠節宏爲人孝友篤親睦宗歲租所入分  
逮姻黨人高其義在南贛以病乞歸逾三年卒

江曉

江曉字景熙仁和縣人禮部尚書瀾之子正德戊辰

進士歷兵部車駕司郎中慎磨勘立條格諸司不得  
濫恩改吏部稽勲司郎中有公恕之稱出爲山東布  
政司叅政嚴督逋賦轉輸及時至京議召商上納隨  
時給估除前攬納侵耗之弊遂著爲令陟山西右布  
政使條陳體國便民六事悉見施行歲大祲太原平  
陽民多轉徙曉極力賑濟安輯所全活以萬計庚寅  
擢應天府尹由太行東道抵金陵所過屬邑皆焚香  
頌德尹應天時除奸釐弊節費勸農復條奏職掌十  
事大要抑奢崇本嚴禁侵冒諸爲浮淫蠹國者悉請  
罷革 上嘉之有體國爲民之袞歲旱蝗竭誠祈禱

甘澍隨降蝗亦尋滅至秋復旱乃發倉賑之所活又  
數十萬人入爲工部右侍郎值 聖駕將巡承天命  
曉先出警道御史胡守中恐臨事愆誤欲先論曉以  
分已責乃誣奏曉稽誤遂逮詔獄獄吏孫綱者守中  
黨也竟考致其獄勒停爲民無何守中與綱皆坐罪  
棄市人皆以此爲誣善之報曉爲人清修畏慎孝友  
端凝事親色養終身處兄弟曙暉曜曲有恩義教暉  
成名曜爲禮部員外仍以已恩蔭官曜子挺林居杜  
門養高書刺不入公府臺省交薦竟不起卒贈工部  
尚書子圻官至提學僉事德望高一時孫鐸始仕爲

刑部主事歷都御史

陸溥

陸溥字原博錢塘人登正德戊辰進士仕爲兵部職  
方主政歷進武選武庫郎尋陞江西叅議遷陝西叅  
政已巳逆瑾擅權盜賊肆出職方稱難溥因事籌畫  
動中機要司馬卿倚如左右手疏奏皆屬焉有聲於  
職方瑾誅以瑾連坐者不下數千人溥白於上原  
之甲戌與給事中漆御史倫奉勅覈京營諸兵馬京  
營諸兵馬素遮於豪右懸其籍溥乃盡括之豪右歛  
衽謝然竊啣之已卯武廟南巡溥與諸省郎伏闕



乞留不報 世宗登極詔復先朝諍臣賜俸一級淦  
有負固者號召至千人將爲亂巡撫都御史以兵事  
屬溥溥出奇兵掩擊之不旬日面縛數百人以歸議  
以其地爲峽江縣戊子赴任陝西至靈寶忽一疾卒  
年四十有五始溥爲江西叅政時吏部薦以按察副  
使凡四請而不報後又薦以叅政亦三請而不報最  
後始遷陝西布政司左叅政人曰此啣者所中傷也  
溥不以爲然志節愈勵而持守益堅生平仁恕易與  
及與權貴交屹然不可阿天水胡績宗銘其墓謂溥  
矯矯本兵翩翩行省究心時務奮志民猷惜未竟其

施而沒云

王 潼

王潼字本澄錢塘人幼嗜學讀朱子語錄遂絕意業  
舉之志聞陽明先生講道稽山負笈往從先生嘉其  
篤志命輔其子仲肅爲學無何配任氏卒時潼年甫  
三十六義任有淑行不爲再娶性好遊慕司馬子長  
之爲人歷齊魯燕趙登泰山攬日觀西望太行薄遊  
都門並海而南遵吳適越東下武昌訪竹樓赤壁之  
勝工繪畫善諷咏其過太行詩有客中秋過半山外  
晉全分之句勤于著述於陰符經程張諸書皆有補

註抗志風塵耻與時俯仰終身不求榮利惟日以山水自娛嘗自品曰亂山秋寺孤燭苦吟平生之滋味也嶺猿江鳥冷荇幽蘭平生之朋好也老牛負載跛驚蹢躅平生之技能也黍離麥秀吊古懷賢平生之寄托也濁酒一盃南華一卷平生之心知也雲停春渚月滿秋空平生之意態也卽此數言可以想見其人矣浴沂舞雩之學脉聞自曾點爲宣尼所獨契茲亦窺見其一班云

許相卿

許相卿字台仲海寧縣人正德丁丑進士辛巳授兵

科給事中屬 世廟新政乃抗疏論政令不便者數  
事先是中貴人張銳張忠恣橫法曹議在死律內降  
欲寬以贖金相卿力爭之又李賢以中貴張欽義子  
襲錦衣指揮林俊以正人被言者譖相卿皆力言其  
非是語剴切多人所不敢言至訾 上爲氣驕志怠  
迥異初心云云舉朝皆爲咋舌由是許給諫直聲震  
天下矣居一年抗疏致仕歸縣官具輿臺騶從如常  
相卿曰此役屬里閭吾故里中人也假令吾乘軒擁  
蓋揚揚出里中使吾父老親故走匿旁舍此于事不  
當吾誼已不入公門毋徒患苦父老爲也堅却之乃

築室紫雲山中巖居川觀食力詠志益務覃思墳籍  
游心術藝之場嘗製短簑長笠以二鶴自隨遇佳日  
披簑戴笠身騎黃犢往來阡陌間喜與田翁野叟爲  
爾汝交就彼食飲或一言目爲貴人輒投袂起矣縣  
令高其賢爲樹表邑中當念一往謝則五鼓伺門入  
向縣治再拜而去時令臥未起卒不能禮之館舍部  
使者歲時存問餉之金錢輒推不受元輔貴溪與相  
卿善貽之詩有九杞山人不出山不將一字落人間  
之句相卿爲人豪邁正直高視一世林居三十年海  
內咸傾仰之中外薦者以十數嘉靖己亥以禮科給

事中召起於家部使臨門敦逼上道相卿力以疾辭  
元輔爲書招之曰 明天子在上故人忝備政府可  
強爲一出相卿報曰居高者勞乃公方飽食無溷乃  
公竟不往後海上變起當路者就問籌策相卿爲口  
畫便宜事語多效其清風峻節老而彌壯士大夫識  
不識輒相敬慕咸謂人中孤鳳云

### 江暉

江暉字景孚仁和縣人濶之次子正德丁丑進士選  
翰林庶吉士初暉父濶官尚書起家翰林伯兄侍郎  
曉舉南宮第四人暉復登第杭因有父子翰林兄弟

會魁以爲美事暉居之若無有也始登仕籍值家室  
早殞有擬錢寧族女者時寧貴勢傾天下衆莫敢忤  
暉獨峻拒之己卯 毅皇帝將南巡暉與同館舒芬  
等抗疏力諫受杖幾斃及館事竟當授編修以前言  
事授廣德州知州爲治廉正剛毅始之官卽法其豪  
梗者以令於州民皆悅服有大姓讐競官司不能平  
將尋兵事暉徐以一言而解勞不坐乘衣不重采省  
徭役減供應爲州二載州人大歡樂之歌謠謳吟徧  
於里巷以翰林院編修 召去已而進修撰屬 世  
皇用言者議簡侍從使更民事擢暉河南僉事未行

而痰疾盛作 特旨許令養病歸二年卒暉精緻修  
潔游心藝苑嫉近代文體淺俚益務爲鈞深奇崛至  
不可以句與齊人曹嘉東楚王廷陳關中馬汝驥共  
聲一時有曹王江馬之稱其爲廣德甚得民至立生  
祠祀之

許仁

許仁字元夫仁和縣人爲諸生時教授生徒方嚴介  
特翕然爲時所宗正德庚辰以舉人授巢縣教諭擢  
河南鄆城令雪冤獄減重徭弭盜捍患勤於撫綏性  
狷執不能事上官調德化德化瘴鄉民獷悍難治仁



一以簡重鎮之毀淫祠改社學建公署導壅渠勞績  
顯著調同安治同未久屬德化豪右以舊憾騰謗罷  
去仁樸茂質直多介少通執義而往率多齟齬於時  
然遂於經學毅然以崇正闢邪爲已任諸所論著皆  
折衷六經多發前人所未發云

### 董穀

董穀字碩甫澧之子正德丙子領鄉薦嘉靖辛丑授  
安義令更令漢陽俱劇邑綏輯鎮定所部不擾介然  
守正罔突梯取容竟與世局枘鑿退而耕於海上安  
貧樂志冲曠夷猶忽值粒罄過午未炊散步澹野湖

濱採白蘋花以嗅茹淡如也旣而侍其父遊會稽扣  
謁陽明王先生之門聞良知之學精修深詣時稱高  
弟每喜陶靖節形影神釋之詩取蘇文忠水月不變  
之旨知者以爲陶蘇並埒云所著有碧里四存全稿  
孫景時

孫景時字成叔杭之右衛人性耿介於世寡諧與越  
人汪應軫仁和邵銳江暉錢唐吳鼎爲友慕章文懿  
胡端敏之爲人師事陽明甘泉二先生學成正德丙  
子舉於鄉筮仕長洲教諭遷攸縣令却餽贐謝常例  
雪貧民唐如景吳伯先在狀逮豪右易滔發其奸賊

本草卷之八  
卷四十三  
論如法人多稱之無何景時解官歸乃蒐輯故典證  
以長老舊聞質諸鄉評作武林文獻錄杭州府誌意  
欲勒成郡乘副在名山惜有志未究而卒

吳玘

吳玘字汝瑩號南岑錢塘人舉嘉靖癸未進士拜行  
人司行人歷司副刑部員外郎廣東按察僉事副使  
布政司左叅政在刑部時嘗同考順天鄉試其所爲  
文章諸老先生自謂弗及故海內知其能文然玘固  
知兵習吏事爲員外摘抉姦隱平釋冤滯精練詳敏  
大廷尉讀其獄詞必曰吾固知非吳員外不能爲其

所治囚卽罪死無號呼不平者爲僉事飭兵嶺南蒐  
士卒立保伍明法令察盜所出沒根披苗薈境以大  
寧連寇作督師征之殺二千餘人降千餘人清遠峽  
險多盜以卒六百人鑿山三十里爲梁二十有一舟  
用得挽以濟爲副使籍民舟之賈於海者什伍爲綱  
紀約寇至擊之其去爲盜者衆發之不發與連坐海  
寇頓輯性疎爽嘉調笑諧謔治園亭西湖之濱與賓  
客燕遊其間若樂而忘檢者至持官奉親特嚴以孝  
縣吏植柑分廨中間以遺之曰此官物吾不可食  
盡易錢輸之庫連寇平都御史御史張宴且以金幣

勞之固辭以免周宜人病痢刲股肉和藥血淋漓下  
不絕痛父以食芋遘疾終其身不忍食芋宦遊四方  
必奉像櫝懸之祭則拜以泣比病不能言數引手指  
像忽自墜其僕曰得非欲奉以行乎領之而逝得年  
六十三初至嶺南勤於其治按行郡邑觸冒毒瘴遂  
患癘比爲叅政會 天子有事安南治益勤旣疾革  
猶日命吏抱文書置榻前臥聽之故以羸卒

### 沈南金

沈南金字子輕錢塘人嘉靖癸未進士授南京大理  
評事進寺副寺正擢廣東廣州府知府處官以誠信

得民調江西贛州贛爲江右巨鎮宿重兵疲供饑南  
金身先節儉以佐民急杜請託忤時貴坐是遠徙雲  
南鶴慶府移疾歸生平伉直簡素性剛方不能容人  
過卽尊貴者嘗面折之士大夫家居有司率具隸以  
從南金力拒却乃徒行里中不入公府處家約素食  
惟蔬衣取布遇子姓嗃嗃至其奉親色更溫若兩人  
然任性獨往堅持孤稜所親或規之曰處世混俗乃  
公獨負爲矯矯哉南金不應操執愈厲年七十有九  
卒

張文宿

張文宿字拱辰號白厓仁和人也賦性奇偉風儀玉立早涉典墳旁及諸子出言讜正不爲詭從處事機發不爲撓阻履道植仁敦孝兼義灌園蒔花效於陵之高風種穀藝桑欽栗里之雅致每讀書齋中攻時業輒閣筆歎曰今何不古哉遂獵秦漢盛唐諸名家書兼攻古文辭詩賦由是籠罩靡前轡轍時輩蔚然動士林望矣始補昌化弟子員督學陳公馨最其文試第一顧愕然曰茲小邑安得有此子哉且神龍祥鳳必擇所處夫然後能大也子豈若蠖鵲安泥淖鮑蓬蒿者爲哉遂改入郡學正德癸酉薦於鄉屢試南

宮不第乃歎曰士握寸管持尺牘孰不欲揚聲闕庭  
以嬉翔霄漢顧虞坂之上不遇孫陽楚璞之中空嗟  
卞氏惜哉命也吾獨且奈之何哉况吾先君以不祿  
養爲恨今母老豈復蹈此轍乎嘉靖癸未卽釋褐授  
晉江令明允信决氓鰥帖服家安耕織之業俗阜絃  
歌之化以風操孤勁自持未究大施遭讒落職乃與  
閩人高石門偕遊武夷山中甚得無幾陳辭辨明作  
拙賦逋歸賦以見已意蕭然長往門堵空蕪亦不之  
怨也後有間言曰晉江稱平官可媒得迨然笑曰吾  
與顏容端同官同罹事然彼事特甚顧顏容端以進



士復官吾獨不利一進士耳志益堅不爲動就西湖  
傍築一小樓樓未及成有二鵲日啗啖從梁題間營  
巢巧逼匠斧人以是爲異卽名其樓曰來鵲樓湖中  
又置一舫大司馬尚書白泉汪公署曰水月樓乃與  
郡中沈青門田豫陽李岫嘯方十洲童南衡張太華  
結爲西湖詩社或遇穠辰豔景輒集諸英華登樓放  
舟賦詩作會詩成酒散互相砥礪騷賦古詩遠宗曹  
楊陸賈而五言七言在沈宋李杜之間其辭華沈着  
不爲浮綺故爲一時所宗云

田汝成

田汝成字叔禾浙之杭州人也嘉靖丙戌進士授南京刑部主事南京刑部以廣東司爲劇而汝成以廉能聞收魏國草場之利而還之民卻嫠婦違制之金而沒之公帑凡百疑獄迎刃而解災異求直言汝成上疏條陳致中和六事以爲修省之助疏留中不下由員外郎轉禮部儀制歷祠祭郎中復遷儀制扈從南郊籍田親蚕及西苑省畊課桑與凡慶成燕享各有頌述壬辰有事於會舉棘闈事宜多所題正先是大學士李時乞遣廷臣分禱岳瀆以祈聖嗣又導上於太廟中仍行卜筮而部議沮之汝成上書切諫

六  
卷  
朱  
榮  
罰俸三個月時行援貢沙汰例而都御史史道御史  
胡明善皆請復舊法楊宜又請禁沙汰汝成議不合  
忤時宰意出爲廣東僉事坐貢士不中式者五名左  
遷滁州知州陞貴州僉事轉廣西左叅議分守左江  
及歸里乃盤桓湖山間探禹穴上四明窮雁蕩泛吳  
淞涉邗江遨遊河洛五六年疾卒所著藥洲學政楊  
園九略炎徼紀聞西湖遊覽志九邊志唐詩樂苑等  
集凡一百六十餘卷

劉紹卿

劉紹卿臨安縣人由嘉靖間進士授行人以建言

廷杖謫貴州思南府經歷單騎遠徙一僮自隨至則  
恪守廉訓克勵官箴會土官楊訓殺人帥府黥奴高  
壁亦坐事當編戍兩人要重貨投之不納卒按致如  
律千戶胡學詩戕其妻行賕要人脫罪一訊得實論  
死王髯者圍奪殺人道中郡吏召捕之一兵官子亦  
王姓而髯懼而自髡爲吏所錄誣服成獄矣紹卿往  
覆按立得殺人者而出兵官子歲饑視督平糶計會  
詳密賦授必均民以不殍閱視迤東諸郡庾積奸蠹  
爲清紹卿疆執不受請託蠻酋武官放恣淫虐不畏  
大官獨難劉經歷耳未幾以疾乞休甫抵家而卒

張 涑

張涑字文東海寧人生有異質方童時日誦數千言  
爲文詞采煥麗氣燄輝赫一時名輩咸推下之皆以  
爲王子安復生也辛卯舉於鄉時尚未冠英聲雋舉  
動於縉紳士大夫樂與之交藩臬大僚至禮其廬焉  
父負官錢數百千涑議賣產以償或曰若幸交當路  
何惜一言遽議棄先人產耶涑曰貲產易得耳至於  
節槩一失不可復贖涑卽餓死不願也竟傾家抵之  
以是家益貧初涑爲諸生與童憲副漢臣方郡守九  
叙友善時稱三傑後兩人皆登仕籍憫涑窶處時時

餽廩輒推不受或固餉之強至再涖勉爲一受卽  
盛治具召其人至共飲食必盡所餉始已涖於世一  
無所屑與當路游談累日未嘗及時事抗志守高曠  
視塵表卽藜藿不給卓如也竟以阨窮不得志而歿  
卒年三十三詩俊爽有奇氣所著有窮居集漢臣爲  
梓之行世

許應元

許應元字子春錢塘人嘉靖壬辰進士授泰安州知  
州貞白自持惠養所部不疲民以媚上行部者以供  
饋不豐罪其僚吏輒投劾欲自免歸部使者固留之

乃止改泰州知州凡典二州卓有執守不爲豪右所撓屈遷員外郎晉郎中出知夔州府廉靖平恕輯和民夷興學勸士暇則弔三閭大夫杜工部遺蹟彬彬雅咏稱儒吏焉久之遷四川按察司副使尋調廣西因攝兵事誅三巨獍巨獍者莫氏兄弟以雄勇名兩粵間往常大嘯破城殺吏前兵備以擒獲報至是罪人始得督撫欲上其功應元念如是則前兵備當得罪乃力沮之不復上人皆多其長者後更數遷始至廣西右布政使所在皆有政績士民悅懷及入覲卒於家應元自幼穎敏日誦數千言篤嗜古作游心藝

松爲文輒宗西京初登第時試庶吉士文已中律賞  
路者欲一見應元誼不往以是不得充館職然閣試  
諸詩已籍籍傳矣天性孝友曲承親志振人困急處  
弟友愛備至周窮樂施傾貲爲義其遇宗黨尤厚溫  
恭退讓恂恂不伐篤厚君子也所著有水部稿所撰  
次有春秋內傳國語史記抄漢語若干卷

許貫之

許貫之字道卿錢塘縣人狷介孤稜不忘溝壑始舉  
於鄉十年不上春官攻苦食貧蕭然寒士人咸介之  
登嘉靖乙未進士授吉水令時按浙使者吉水人也



意有所屬卽欲酬以浙事以微言諷之貫之曰如此則類貿易有市心矣拒不可愛養部民煦之若子權貴干請一切謝絕由是吉水治行爲江右冠而士大夫多憚其峭直徵入爲兵科給事中兼去官卽出已貲葺廨宇繕器具以待後尹曰吾不忍重勞民也其瘠已厚民若此在諫垣七日而歿行篋惟故衣同年親故代爲歛之貫之清苦有介節矢志不爲造請非其道千金弗視也死之後妻子貧乏幾不能自存

張瀚

張瀚字子文號元洲杭州人也二十五成進士爲王

文成嘆賞泛覽羣書尤酷嗜左國莊騷至寢食俱廢  
遂燁然成名當世初任部郎一造船再讞獄勤慎稱  
職已知廬州減賦墾田教民築堤濬池歲旱澇則身  
爲犧以禱視囚雪陳邦寃諸政斧斷理解不減包孝  
肅爲治行第一補大名值庚戌虜變募兵入衛赴期  
立辦諸郡莫及兩爲太府廉直不阿每與臺使當庭  
爭可否如辯開守誣禁巡司賄至今邦人稱之時亦  
以異等擢潼關治兵使已叅嶺藩未幾調蜀晉閩又  
自晉臬轉陝西左右轄凡十年三入關卽其地擢巡  
撫都御史防秋固原不撤兵虜躡入以我軍有備宵

遁撫終南饑民須臾投戈散去遂卿大理貳刑部後  
以兵貳兼憲職督漕運移督兩廣芟劇賊定羅旁會  
有駕禍者功高不賞時論共惜謝歸起原官再撫關  
中遷掌南臺南大司空值神宗卽位召入爲吏部  
尚書時楊襄毅病免會推三人上越次用之持衡  
數年所殿最黜陟務以進賢退不肖爲主每錄選人  
姓字上注御屏欲上時時目之又議酌選規行  
久任崇實政遴真才稽章奏重責成嚴考績慎拾遺  
要以愛惜人才本之忠厚一時吏治喁喁近未有也  
爲吏部幾再考滿上益冲懷嚮治注意老成故相

江陵亦嚴事之逮奪情事起徵上中旨屬諭留江陵亦自削牘諷使留已瀚謬爲不聞也江陵始不悅因嗾臺臣中之及歸飄然嘯咏湖山間迨訃聞卹贈謚廕備極憂渥善書法兼工點染詩若文莊嚴典則歸之爾雅有奚囊蠹餘二十卷續集二十卷松窓夢語八卷臺省奏議十四卷藏於家

傅霖

傅霖字朝鳴號虛巖仁和人嘉靖乙未進士授興化知縣至則爬垢剔蠹日夜皇皇求蠲民瘼其甚者軍竈奪民田產不稅不役民負累逃亡過半至困死無

愬司軍竈者又深庇之而視民如讐前令不敢詰詰輒爲所構往往罷去霖曰若是何以令爲乃極言宿弊疏上於朝者三必行而後已雖沮撓百計至有擐甲以攻者棘棘持議益力卒還軍竈所攘奪於民者民乃甦田賦悉平頌聲嘖嘖滿道路肖像立祠於邑又以餘力修治學宮日羣士子講說經義以相磨礪疏濬河流縈遶迴合如玉帶在興化三年績譽日著召爲兵科給事中霖知無不言言無不盡有可以報朝廷者不遺餘力世廟南幸以才望扈從武定侯郭勛怙寵驕恣不法無人臣禮回鑾之日卽抗疏劾

之忤旨奪職聞命欣然就道歸數年郊廟禮成得還  
章服霖夙稟正直平生無脂韋媵媵態又素有經濟  
天下志地方諸所利弊有可以裨民生益國計者遇  
事侃侃論辯不少假聽者無不捧手起敬觀風使者  
前後薦剡凡十四上竟不用 穆宗卽位廣開言路  
蒐羅海內名士時巡撫趙公玉泉首以霖應又例當  
引年僅晉秩太常寺少卿致仕

茅 瓚

茅瓚字邦獻號見滄錢塘人侍郎麟之子生有異兆  
數歲卽疑疑殊凡兒日誦數千百言稍長益穎敏絕

人從父入京畿時有豫章人鄭先生者說朱氏易所  
居從徒常百人往遊其門百人者皆服以爲出瓚下  
卽瓚亦自以爲百人者莫予若也會有司試士父欲  
其占醫省籍就試長跪辭曰士致身重先擇塗大人  
奈何令兒從他塗進耶父韙其言爲資遣佐之歸每  
試輒高等名益大起士挾策從遊者日益衆丁酉舉  
於鄉明年試於南宮學士無錫華公察首得其卷大  
奇之欲以冠魁列傍有相沮捍者華不懌曰楚玉在  
璞何患無知者是子卽試大庭衆迄能嫉抑之耶人  
奉殿對 上果親擢第一甲第一人授翰林院修撰

在館職刻意學問六經諸史旁及百家稗雜之說靡  
不深究其與人處則又簡默不自炫情情若無所知  
能人故滋以公輔期之庚戌滿九載陞左春坊左諭  
德壬子陞南京國子監祭酒扁所寓之堂曰身教律  
已嚴恪動應矩度其餘規條格令岌岌不少假六館  
士承教指惟謹無或私謁於門者踰年改國子祭酒  
尋陞南京吏部右侍郎改禮部右侍郎居無何 上  
諭輔臣簡忠謹文臣二人供內撰輔臣以瓚暨洞山  
先生應詔可兼翰林侍講學士踐其任瓚長身玉立  
儀觀岸偉 上每屬意焉乃益蚤夜儆儆畏懼無敢



忽洊受 上眷寵數出廷臣右丙辰轉左侍郎丁巳  
加太子賓客兼學士賜仙鶴服三年考績誥贈祖考  
如其官尋加二品俸賜飛魚服改吏部左侍郎兼職  
如故會得足疾不能起視事遂上疏乞歸 上屢賜  
問疏再上乃允諭有司愈日以聞尋愈有司上狀竟  
弗召間出賜金構堂數楹題曰榮賜曰此金者望主  
所以寵勞從臣也吾不敢隱君之賜抑使後世子孫  
或覩是興思厲術業以効報乎瓚爲人夷爽洞達不  
事機防自爲諸生卽負意氣自高不能曲徇人旣官  
翰林益嶽嶽養重於人卒難合遇勢權隆灼者亦未

皆姘媼求媚附人以是重之而亦或以是忌之云

### 吳源

吳源字宗乾號龍江錢塘人嘉靖戊戌進士授工部  
虞衡歲收諸所輸縑若軍仗當事者惡其濫惡輒鹵  
漬而刀碎之輸者大困源以膏硃印識縑兩端以火  
烙印識軍仗濫惡者不得行而民免於困荊州例推  
稅當事者易以垢壤受命往權滿歲卒以廉稱尋進  
屯田司員外郎會太廟役興江淮運木者多後期  
不至上復以源往劾慢吏詔械逮有司震恐事遂  
集然勢家亦以此忌之迨遷遂得廣西僉事閱歲有

追叙其勞者稍改江西在廣西時兵部尚書惠安張公實總督其地負才望察吏少當其意者及見源獨折節下之入叅謀畫出董師旅時屬郡劇寇掠人妻以邀厚贖官兵不能制用間擒之并滅其黨及徙江西行部至南安方解轡卽按治知府某不法事某卽日解印綬遁去贛故所招新民互格殺會有以反告幕府議以兵往源謂仇殺新民故事耳激之則易以滋亂不如遣間諜柔之幕府善其策果如所料民得免於兵遷福建布政司叅議福建道里固遠阻京師令歲出其所徵易輕齎市諸物以輸而所市物利害相

去或倍徙管輸者偶值其害卽破家不足償役益逋  
不赴源至三分其等爲上中下以極利兼極害者中  
則自爲一等無所兼輸者趨便而役益集久之會御  
史某以清軍至福檄源厚聚賂以貽所趨附源却之  
改遷江西按察司副使舊僚在福者或勸之遜謝以  
釋其恨源益却之乃竟以是被撫而意亦厭仕進竟  
以老歸卒源仕江西職兵務其處置尤偉今鄱陽湖  
中令沿境遞護客舟使盜不得劫卽偶得劫勒其地  
使羅獲不獲則罪之盜遂衰息亦其一事也爲人謙  
厚簡慎孝友惠慈貞亮明允故於家於鄉於官靡不

以德稱至於窮研極博稽考作述則又爲當世學者之所宗云晚關龍江書院娛老其中鄉大夫士造請無虛日歿而祀於學宮

### 高儀

高儀字子象別號南宇世籍杭之錢塘父夢于肅愍而生儀儀穎異慕于公之爲人亦每自負嘉靖庚子以易中浙江鄉試第六明年舉進士二甲第一人改庶吉士嘗試文淵閣賦見者驚賞遂有聲館閣間癸卯授編修時柄臣某方寵倖傾中外悅其嫺文藻欲羅致門下數遣子及門風指儀拂其意遂大銜忌而

名行蒸蒸益起隱然負當世之望矣丁未同考禮闈  
戊申予告歸比還與修國典壬子疏乞終養適  
莊皇帝在潛邸將出講學所司奉世廟旨慎選儒  
臣充講幄首儀詔下會以外艱奔歸歸而又逢母  
喪守制里中四年浙人趙通政者爲柄臣狎客得視  
師浙中藉勢驕橫於鄉里諸謁者旁趨治屬視之儀  
弗往也趙旣先儀乃報謁中馳入獨抗禮無所訕趙  
亦不能有加於儀丁巳陞右中允管國子監司業事  
而嚮通政者已官尚書屬其甥國學舍中令母卒業  
而超銓也數款曲致謁儀固不可趙恚語人曰何物

司業乃爾尊大耶然竟亦不能有加於儀久之陞侍  
講學士掌南京翰林院事居南都又幾三年會柄臣  
以罪罷去遂用僉議陞太常寺卿管國子監祭酒事  
甲子陞禮部右侍郎明年轉左又改吏部左侍郎兼  
翰林院學士教習庶吉士尋掌院事丙寅陞禮部尚  
書仍兼學士世廟方嚮意用儀會崩不果先是朝  
儀久曠故籍散失隆慶改元始設展寧臨羣臣奉祝  
冊謁宗廟具法駕郊見上帝幸辟雍釋奠講經  
諸大典禮咸倚辦春曹旦暮待報無從考質儀以其  
意酌今昔之宜修舊起廢燦然明備無不當乎人心

舊制合享天地以日月從嘉靖中乃分建四郊於是中官有請合祀復洪武舊制者儀固不可曰洪武初不分祀乎卽分亦舊制也何必改作竟寢其議或問合享非歟儀曰無論非是奈何令中官得與外庭大議衆譴之 孝烈皇后先以保護功附 主 世廟儀奉遺詔議遷其主內殿而附元配孝潔秩然足垂一代彝典他如主薛文清從祀革張真人道號及諫免舊邸之遊幸停取光祿之羨銀並關切大體詞藹義正讀其疏無不稱服 上方五齡儀數引漢有司蚤建之議抗疏皆見嘉納儀典禮三年紀法無不行



者然故多病不任勞丁卯秋乞休致疏七上咸優詔  
勉留已巳冬復懇疏乞骸骨先後凡十二上乃得請  
以典禮勞加太子少保賜馳驛傳歸輔臣言官交章  
留儀僉謂儀可大用於是雖去而望亦滋重矣去之  
逾年 先帝以 今上在東宮且出講學念 先朝  
耆舊可備保傳無踰儀者詔起用於家辭不許乃單  
車就道壬申春三月朔奉詔日侍 神宗講讀於文  
華東序夏四月進兼文淵閣大學士儀負望久數病  
數起晚而大用中外方想望風裁而溘焉逝矣傷哉  
訃聞 天子震悼賜恤甚厚命以一品禮葬祭廕子

中書舍人謚曰文端儀體貌魁梧而性簡寡言笑每  
定大謀斷大義羣情指顧間徐出一二言決之切中  
肯綮既貴雅飭如書生自視恂恂無他技及見權勢  
炫赫羣然風靡者若無有也雅恬素絕紛華珍玩之  
好家不畜姬媵獨文史自娛入官三十年世業無所  
增加舊第既火終儀之身未嘗營創再歸皆假館於  
人不以爲意卒而發篋不給歛具門生故吏爲歔歔  
泣下儀平生不爲餽遺干謁人亦無有能餽遺干謁  
之者古稱社稷臣招之不來麾之不去蓋其風度如  
此明興以來錢塘著稱者肅愍暨儀其人品位望相

埶然肅愍遭遘不辰儀業雖未究而完名令終過之  
夢徵固不虛也詩文若干卷藏於家其孝友著在家  
不書其享壽五十有六

沈楠

沈楠字汝材號讓亭仁和縣人舉嘉靖辛酉浙江鄉  
試戊戌登進士奉使三邊歷三關太行之險慨然有  
封狼居胥意尋授南昌郡理南昌簿牒叢委獄情詭  
秘防檢既周聽察尤慎姦欺屏息請謁不行以故幽  
隱畢達人雪覆盆之冤市絕橫羅之辟其最著者郡  
人范某兄弟爭產一言感悟和好如初贛州周某父

于並戍遣廉其誣立爲昭雪花園鄉故稱盜藪役久  
無功受牒單騎詣賊賊皆面縛悔罪願釋戈歸農楠  
白於部使者盡解縱之事聞有白金文綺之賜楠雖  
法吏以真誠長厚處其官人咸德之聲稱翔洽召爲  
江西道御史議察四門令嚴禁豫寺人門卒皆相戒  
無犯每有論建務持大體同臺多自以爲弗及巡按  
陝西下車問民所疾苦延見藩臬諸大僚諮以吏治  
失得及部中豪不法政事所宜廢舉興廉平墨威暴  
澤枯且詢且行孳孳若弗逮又閔延綏兵馬入衛之  
疲勞遼薊苑馬寺芻餉之煩苦西安鳳翔漢中三郡

分辦花馬池鹽課之利害方欲條上方略請行之而以觸暑西征焦勞卽事行部諸郡邑劬瘁骨立未及上而疾大作矣削疏引告待命耀州竟以疾卒士民相與悲傷之櫬發關中關中人白衣冠而送者如堵皆緣道哭泣夾車轂頓足而嗟嘆焉爲人孝友疎節而廉於財遠聲利如臚喪父食貧事母曲盡志物撫諸弟宗族有恩於人交無少長賢不肖咸盡其心絕口不郵傳人過失其篤厚如此卒萬曆乙亥年僅四十有二

翁相

翁相字輔卿錢塘縣人登嘉靖戊戌進士授工部虞衡司主事以親老乞南改南京刑部郎中出守廣平廣平爲畿輔股肱郡若古馮翊扶風故事郡二千石出入輒得陳兵幟羽葆鼓吹導騎士儀衛甚尊寵相至悉罷去嘗單車行屬邑所爲卑身厚民類此郡故多盜白晝劫獄殺吏民甚橫相捕得其桀驁者法之餘悉縱舍盜旋亦解散河北諸郡饑相不及以檄聞開倉賑濟全活甚衆由是諸部使者交上其賢稱相治行爲河朔最旦夕且報遷而相已移疾歸矣爲人耿介直諒少與許右使友善以忠節相期已俱嶄然

云車夕年ノ生志 卷四三 三二 列 智  
樹立鄉邦稱賢士大夫僉謂翁許善交庶幾古切劘  
之義云居鄉貞素服食不求華美杜門養高誼不入  
公府士人識不識無不嘆其長者

陳善

陳善字思敬號敬亭世居錢塘嘉靖甲午舉浙江鄉  
試第二人辛丑成進士拜歙令初至屏供帳一切汰  
省示民惻惻歛故健訟善以至誠化導訟日簡無何  
丁母憂服闋補桐城時父司訓崑山甫出都門覺心  
動馳抵崑父果疾革居三日而永訣僉謂其孝感云  
已西北上應聘分校順天士兼易詩得榜首孫公鋌

二十四人已補清苑清衝劇而疲尤加意損節先是  
金臺驛站馬出闔郡諸州邑厥後變爲輸銀貽害尤  
甚善議仍前規均派爭者蜩起會內轉力請於當塗  
行之而清人始蘇在禮曹典屬國往朝鮮諸夷以貿  
易輦漢物歸縣官費供輸無算犴僧售苦窳爲吏人  
病朶顏盲夷且有僞增名物者善悉糾禁之言於宗  
伯華亭徐公著爲例進主客員外郎尋轉僉憲督學  
廣西首迪士以正學使知根本重德行倣何仲默關  
中學政令誦習經書傳記子史古文詞粵士彬彬嚮  
風焉未幾轉叅議駐惠潮海寇初平瘡痍未復一務



休養安集境內宴如旋轉副憲督滇南學其型範規  
條無改西粵之舊載刻小學句讀自警編忠孝歌頒  
教諸生遷滇右叅政督理銀場諸言開礦利者俱報  
罷始善當督學時以執法忤鎮臣且忤御史至是被  
誣論褫秩去已而東甌王侍御諱按滇廉其枉力辯  
于朝詔復原官隆慶改元改山西按察副使尋轉江  
西左叅政未匝月轉廣東按察使善以刑獄關係民  
命精審讞牒洗冤剖疑纍纍多異政粵人至今誦之  
會流賊曾一本寇廣城城門晝閉軍民扶老携幼向  
城而泣善惻然曰奈何棄數萬衆於鋒刃下爲啓門

躬爲殿而入之門矢幾及車蓋竟以無虞轉雲南右  
布政使自貴入滇道崎嶇甚善捐俸爲倡關險爲夷  
者數十處滇人聞其至喜甚善亦樂撫之興利剔蠹  
不遺餘力黑白鹽井久爲墨吏豪家所乾沒於是釐  
刷一清商民稱便滇歲採上供金二千兩而滇寶少  
產金戶業困且復增輸三千善建議派價諸州邑市  
金蜀之寧番越雋以解民得無擾六衛諸倉散歛爲  
奸利詳定條例刻石永絕弊源撫臺某欲奏行戰象  
之法於朝力言西北非用象戰地象產炎微不耐邊  
苦寒每市一象於土夷度費金五百而水陸萬里煩

擾百端貽患匪細議得寢故事上官襲廢黠胥多方  
難之索其重賄善卽與轉聞曾無停晷嘗曰治滇以  
馭夷爲要沅江武定之事失其心也人以爲名言會  
武定之役兼攝洱海道事武定經鳳氏變後議更城  
獅山城激江城廣西嵩明兩城四役並起物力不支  
善多方調度不踰時而工就復立哨建堡以峻金沙  
七度之防推誠布信民夷大悅昆明之旁山曰橫山  
山陽有田五千餘頃地高苦旱善視白石崖有泉在  
上遊可引溉而爲橫山所隔議欲鑿山通渠兩臺難  
之善曰事在我耳卽矢衆禱天焦勞經畫山前後並

興工開鑿之居滇三載久蓄去志而以方有事橫山  
淹留歲月至是決意引去遂上疏乞骸骨蠲日啓行  
則橫山水洞忽報開通傍山數萬家受其利因名其  
洞曰惠濟立祠洞旁肖像祀之去滇之日行李蕭然  
豕牢嚴公清有眼前鐵漢撐天地暗裏丹心泣鬼神  
之句旣歸造請盡絕自御簡素纖嗇至修築堤塘道  
路勞費不憚若觀音塘黃泥慈雲二嶺皆有修築已  
丑冬瘠甚然無他疾曉起猶巾櫛如常勉諸子孫以  
立志遠大親正人等語夜呼季公來訣奄忽長逝正  
命考終享年七十有六所著有粵臺行稿二卷黔南

類編八卷黑白鹽井事宜大衛倉條格二卷杭州府志一百卷勲賢祠志四卷族譜二編家藏稿五十二卷

徐炳

徐炳字仲平海寧縣人嘉靖癸未進士授南京刑部主事進郎中陟河南兵備僉事以憂去改山東僉事擢湖廣叅議轉河南副使兵備大名減供餉汰冗費裁省民兵濫額以休養魏人魏人咸德之屬邊戍缺伍部使者出清勾諸郡邑令甚峻炳曰勾軍補尺籍無益裁補祇破民家又發間左護之行兼亦破里乃

入言部使者不便狀一道得以全活轉山西布政司  
叅政無何卒炳爲人孝篤於慕親少以父命嗣其伯  
氏乃獨加意所生庚戌中會試以近例仕籍不得書  
本生父遂罷廷對歸友愛諸弟教子以義方與人交  
坦夷爽剴不爲町畦自奉澹泊在大名值米貴遂舉  
家食黍豆潔廉好修省中士大夫悉稱炳爲端士云

陳洪濛

陳洪濛字元卿號抑菴臨安人嘉靖辛丑進士授刑  
部主事歷員外郎中出守彰德郡時鄭王好文學譔  
四箴規時政庶人佑善誣王上怒甚遣大臣就訊

爲白其狀以上止錮王終身趙將軍厚燭麝奸人女  
死乃擒殄其黨趙宗爲安擢按察副使備兵九江多  
盜區傷敗王旅至則勅諸賊曹跡賊所在必窮剔毋  
縱數年之間長江晏如而又以其間補伍清屯練兵  
增堞潯陽遂稱重鎮庚申陞左叅政蒞山西冀南時  
伊王橫恣不道都御史疏其罪於朝遣使驗問不服  
廣賂緩獄上更遣趙司寇覆按而以洪濛輔行曰  
是嘗按鄭藩者聞命卽乘遽往盡得其諸不法事詞  
具服國除幽之中都前後兩平亭宗正事皆當旨而  
以晉藩按洛尤異數云遷長楚臬前是二令被逮訊

之乃斥其墨敗者寬其微文以中之者比遷去令懷  
數百金伺道上大怒吾豈敢以金故緩若耶而奈何  
以私讐我擢右布政轉左遂拜右副都御史撫治貴  
州時施州酋黃中叛擾雲萬等縣合檄川東諸道兵  
進討賊入深箐陵高阻隘發蘭石傳毒矢以拒我師  
乃募死士夜從間道上先發其機率衆直抵寨門呼  
聲震天地擒斬千計破洞寨百餘賊勢窘因投湖北  
降事平上書乞骸骨再疏得請未卽途忽鎮遠印水  
諸苗叛亟誓師討平之丁卯得代歸時子禹謨已成  
進士矣



錢立

錢立字守禮仁和人嘉靖乙丑成進士授刑部雲南  
司主事時海忠介以言事下獄居處橐餽視遇惟謹  
忠介公得長繫無恙有舞文胥當戍未決一日以新  
鄭書來謁立謂法官所知三尺爾而意是書且有詐  
往質之果然新鄭怒欲置胥死立曰法無是殺之與  
骫法等竟坐戍去爲刑部一年調兵部視武學丁卯  
請假將父還武林明年赴京除工部屯田司督厰主  
薪蒸條上便宜七事汰冗剔蠹以廉幹聞已巳丁父  
憂壬申復除工部會有山陵之役監將作役竣校費

省宅曹什之三四同舍郎更反唇謂矯詭爾何術而  
所省若是旣錄勞賚銀幣加秩一等而其後同舍郎  
以工圯貶絀有差獨立所治完好不及於法始知實  
躬親拮据用勤爲省非曠祿其迹以徼名者癸酉進  
營繕司員外甲戌進郎中尋擢知太平府時蕪湖無  
城盜剽關稅操江都御史備兵使者並被斥檄守令  
期日獲盜令急不知所爲執賈人誣伏償亡欲以塞  
責立聞之曰是盜非盜有司真盜矣解縱之授捕者  
方略不決旬盜盡獲所縱家戶祝曰公實活我始議  
城蕪立謂蕪不虞盜盜所利賈人爾牒當道賈七民

三受役令旣布而城成壯乃逾它郡西湖田千頃岸善崩剝石堤四十餘里郡人利之又郡有馬戶國初時所籍使牧馬者後乃賦其芻賦重不能支率亡去有司猶追呼不已立謂此與伍籍異取其額槩攤之闔邑而馬戶數百皆復業矣在郡四年勸農蠲逋平獄詰姦興學作人聲籍甚部使者交推轂凡二十餘章擢廣西副使治兵永寧永寧猺獞地謂不當繩以一切惟是蕩佚簡易寬其小過宜易爲治適土夷爭山治兵相攻諸武吏競請勦立不聽檄諭以禍福皆羅拜惟公生死之乃法其一二首難者餘置不問所

全活無數生平恬於仕進自郎署典郡意未嘗不在  
林壑而會入寨議起不忍戮無辜以易首功與督撫  
爭之強遂投劾不待報歸旣歸精心課子屏跡公府  
獨時與二三朋舊結社湖山間晚歲兀坐一室焚香  
手一編不戾念是非利害顏所居軒曰怡老論者謂  
生平有三不識與人坦直如不識世間有機穽事衣  
食淡菲室無姬媵篋無珍玩如不識世間有嗜好事  
緘默不道人過有及人惟簿者則閉目不應如不識  
世間有殺襍事蓋其天性也享年六十有三

沈儀

沈儀字懋德仁和縣人銳之子生長高華恥習紈綺  
正德己卯舉於鄉每下第歸卽閉門讀書廳事左右  
列圖書古史日婆娑其中若將終身其於聲利澹如  
也如是者二十年嘉靖戊戌授清江縣知縣恬澹寡  
欲安靜不擾敦厚簡朴以輯和吏民吏民大歡樂之  
督學使者徐公階行部至清江見其衣冠樸野心頗  
易之居數日則察其六事修舉所守卓然乃歎曰設  
吾以皮相天下士幾失賢令矣陞惠州府通判遂投  
劾歸始司寇公素無厚遺儀又不治生產家窶甚人  
不能堪獨端居靜養游心境外若孤鶴高騫有翩然

之致孫瑞臨官行人

邵旭

邵旭字以升號竹泉仁和人嘉靖壬午謁選吏部授  
知閩之同安縣同安巖邑時漳寇入境爲患督兵擊  
之捕獲殆盡賊黨有馬姓者暮持千金爲某請命恚  
曰此曷爲至也發之皆論死有民陳姓者通黠胥爲  
僞印覈實寘於法四境肅然至民有訟則多溫言喻  
遣之有不可已者亦爲推誠處分不盡法比歲旱徒  
跣行四十里禱於神雨輒至民甚德之御史諸監司  
皆藉藉稱賢令得羸疾卽投効去旣歸杜門角巾不

復與天下事矣蚤失怙十歲事母陳恭人甚孝已復背養乃泣然曰所貴榮祿以逮親也不逮何施故雖業舉子而進取之念日益衰云南築蔬圃樹藝其間圃中有竹泉精舍邀月臺吟風亭茶床藥罏羅列其間賓至則班荆坐已登亭涉園取蔬治具飲酒賦詩竟日廼罷優游以上壽終老於家

張輿 張輅

張輿字行中張輅字行素仁和人兄弟皆名經善詩文篤於孝友輿上書闕下授刑部主事輅兩領鄉薦有聯輝集行於世

江圻

江圻字子望仁和縣人曉之于隆慶戊辰進士授南京刑部主事陞郎中斷獄平允請託不行擢廣西提學僉事崇聖學黜異端遏止奔競嚴抑僥倖以敦士習褒崇忠孝節義今昔所湮沒者皆表章之使善類知所勸考校諸士躬歷炎瘴不以牒召致之曰吾不忍逸已以勞人也品鑒精核人皆服其公明又署諸篆民夷兵食酬荅總總圻分畫悉當犁然中律屬有侵其職守者遂抗疏解官歸蟬蛻軒冕高視一世卽當路力挽留之不顧也圻爲人純孝天植父母病憂



形於色嘗藥舐糞衣不解帶行不正履居父之喪泣血三年枕苫履塊食淡茹蔬不入燕室三年一日也每過其內目必俯不一視婦過亦如之當路高其行欲以孝旌廬圻力辭謝曰奈何以父死爲名高哉力行古道人以是稱之則恐懼思逃焉謙恭篤厚生爲貴家子父祖皆至六卿身又弱冠掄魁京國其所被服僅如寒士遇閭里親故至窮賤者輒卑身敬事之以是賢聲溢於衆聞郡中輿臺里婦亦知其爲君子也方承天每稱之曰江子望居喪有古人所罕聞今人所未見者人亦以爲信然江氏五葉衣冠清華赫

奕曾祖叅政玘祖尚書瀾父侍郎曉諸父修撰暉及  
圻皆以德義名聞縉紳五人者並祀鄉賢亦今昔所  
僅見云門人私謚圻爲端孝先生子鐸舉進士仕西  
曹歷官都御史

胡繼

胡繼仁和人世寧子也幼讀書不大了了父亦棄之  
世寧調兵至江西兵官以世寧出見繼繼曰兵素不  
習安能見我父哉兵官跪請教繼乃指示進退離合  
勢甚詳凡三日而世寧歸閱大異之顧官兵非能曉  
此者以詰不能諱其實告世寧歎曰我有子自不識

何也自是擊賊必從凡有謀略世寧十不失三繼策  
十不失一也世寧上宸濠封事繼跪曰疏入必重禍  
奈何父曰吾業已身許國矣疏到世寧下獄是歲繼  
因念父病死

董 澐

董澐號蘿石海寧人也以能詩聞江湖間與其鄉之  
業詩者十數輩爲詩社旦夕吟詠至廢寢食遺生業  
時俗共非笑之不顧以爲是天下之至樂也時年八  
十有六遊會稽聞王文成講學山中以杖肩其瓢笠  
詩卷訪之入門長揖踞上坐文成異其氣貌且年老

矣禮敬之又詢知其董蘿石也與之語連日夜蘿石  
退謂何生秦曰吾見世之儒者支離瑣屑修飾邊幅  
爲偶人之狀其下者貪饕爭奪於富貴利欲之場而  
常不屑其所爲以爲世豈真有所謂聖賢之學乎直  
假道以求濟其私耳故遂篤志於詩而放浪於山水  
今吾聞夫子良知之說而忽若大寐之得醒然後知  
吾向之所爲日夜弊精勞力者其與世之營營利祿  
之徒特清濁之分而其間不能以寸也幸哉吾非至  
於夫子之門則幾於虛此生矣吾將北面夫子而終  
身焉得無以旣老而有所不可乎秦起拜賀曰先生

之年則老矣先生之志何壯哉入以請於文成文成  
喟然嘆曰有是哉吾未或見此翁也雖然齒長於我  
矣師友一也苟吾言之見信奚必北面而後爲禮乎  
蘿石聞之曰夫子殆以予誠之未積歟辭歸兩月棄  
其瓢笠持一縑而來謂秦曰此吾老妻之所織也吾  
之誠積若此縑矣夫子其許我乎秦入以請陽明子  
曰有是哉吾未或見此翁也今之後生晚進苟知執  
筆爲文辭稍記習訓詁則已侈然自大不復知有從  
師學問之事間有或從師問學者則闕然共非笑指  
斥若怪物翁以能詩訓後進從之遊者遍江湖蓋居

然先輩矣一旦聞予言而棄去其數十年之成業如  
敝屣遂求北面而屈禮焉非天下大勇其孰能與於  
此如蘿石固吾之師也而吾豈足以師蘿石乎蘿石  
曰甚哉夫子之拒我也吾不能以俟請矣入而強納  
拜焉陽明子固辭不獲則許之以師友之間與之探  
禹穴登廬峰陟秦望尋蘭亭之遺跡徜徉於雲門若  
耶鑑河剡曲蘿石日有聞益充然有得欣然樂而忘  
歸也其鄉黨之子弟親友與其平日之爲社者或笑  
而非之或爲詩而招之返且曰翁老矣何自苦若是  
邪蘿石笑曰吾方幸逃於苦海方知憫若之自苦也

顧以吾爲苦耶吾方揚鬐于渤澥而振羽於雲霄之上安能復投網罟而入樊籠乎去矣吾將從吾之所好自號曰從吾道人子穀仕至漢陽守亦精於名理有四存稿行世

黃裳

黃裳字子重錢塘人父逸山公稍稍以積著起家貲甲里中晚乃旁落諸子咸卽市操三五以贍而裳獨爲諸生髫時文弱無以給業幾廢書從賈顧適市而心賤之喟然太息曰丈夫竟賈人游乎則益市書窮日夜讀不休然益窘則引錐自誓無悔二十三試有

司輒高等學使者芹山陳先生試補邑博士弟子員  
陳先生校藝名知人所獎拔士咸名輩簡諸生博通  
它經者俾授室獨器重焉及東昌司理汪存吾公兩  
人乃競起爲名高而里中惠副憲公聞其名延至家  
爲其子師於是諸弟子從游者羔雁成行咸稱鶴洲  
先生門人云性孝友旣用文學爲時所推重東脯所  
入益市甘毳以奉兩尊人兩尊人亦心樂之忘其匱  
也諸兄弟賈者顧業益衰裳引與居處衣食共之母  
病醫藥必親嘗乃進禱祀籲天丐以身代不得則柴  
毀骨立所爲治棺歛飯含喪祭之具不以貧故有缺



禮不以煩諸昆也居喪痛哭三年如一日顧懇傷逸  
山公心朝夕率嬪子上食問寢興居七年而逸山公  
亦歿葬之如喪沈孺人時屬歲儉資用不給拮据營  
厝必如禮乃止孝篤於親其待內外姻戚咸有恩紀  
伯氏歿不嗣丘嫂又盲也奉事之盡禮從子汝淳貧  
無所託收教之已又資給之爲之娶婦嘉靖中有島  
夷之難郭門之外燬焉倉皇以身翼護二三百仲及  
李孺人奔城中所與共草衣糲食必均誼亡使身獨  
溫飽生平所卵翼而振恤者不可指數諸子咸父事  
之遇紛難出片言解之無不人人厭意以去敦信獨

行里中化之其有不軌於行者咸閉匿自訟人比之王彥方司馬德操之流焉生平不以貧賤有所屈志博士黃公憐其賢議請公粟助之喟然曰死易耳黔婁於陵吾師也吾不以身爲市郡中舉高行欲致於賓筵謝不可卒避之而性喜清言揚確古先王之風與人交澹而不渝若劉道光廩文成諸人咸莊事之時時奉杖几徜徉湖山間性不善飲詩歌自娛晚乃一切謝人事降心佛理有所鑑云

沈宣

沈宣字明德仁和縣人由歲貢官安慶府學訓導天

資明敏銳意攻古文詞尤長於詩下筆立就有驚人語晚節好畫山水多興致所圖繪者世人爭珍藏之

洪

馬洪字浩瀾錢塘縣人賦性渾厚吐辭雍和博學工詞章擅名東南清修苦節教授生徒以給其家事親竭力孝養與人交吐露肺肝無所匿避善爲聲詩有長慶以還風致其詞調尤極妍麗皓首韋布而含珠吐玉錦繡胸腸所交皆一時名流每出遊衣冠雜集車從都雅超然在塵壒之外焉

鍾化民

鍾化民號文陸仁和人爲諸生時卓有文譽登萬曆庚辰進士初令惠安循聲懋著當事者以其才堪煩劇調樂安縣益自勵精凡爲地方興利不辭勞怨撫按以卓異報擢四川道御史巡歷陝西山東車轍所至利弊肅清偶言事忤當路調行人歷郎署陞光祿丞會河南告災人幾相食欲得一任事者往賑朝紳共推其才謂非化民不可上特詔仍兼御史銜遣之行益重其事也化民入河南一味鎮靜與百姓同甘苦多方區處耗盡精力地方得賴以全活事竣報命繪災荒圖進御覽列民間疾苦甚悉上爲之惻

然本年轉太常卿適河南巡撫缺銓部會推上請化  
民列名第五而上特超擢之亦異數也不逾年卒  
于官 上念其勤勞特賜額忠惠祠中州之民至今  
猶尸祝焉

陳禹謨

陳禹謨號心抑仁和人萬曆丁丑進士授中書選御  
史巡塩兩淮巡按江西所至以簡肅稱請養里居十  
年起補巡漕陞太僕卿巡撫鄖陽轉刑部侍郎卒于  
官禹謨生平不務講學之名而居官居鄉皜然不染  
似深心于學問者庶幾于不言躬行之君子云